

**ТӨРИЙН БАЙГУУЛЛАГЫН ЗАРИМ ЧИГ, ҮҮРГИЙГ ТӨРИЙН БУС
БАЙГУУЛЛАГААР ГҮЙЦЭТГҮҮЛЭХ ГЭРЭЭ**

2021 оны 3 дугаар
сарын 26-ны өдөр

Дугаар 23

Улаанбаатар хот

НЭГ. НИЙТЛЭГ ҮНДЭСЛЭЛ

- 1.1 Монгол Улсын Засгийн газрын тухай хуулийн 19 дүгээр зүйл, Татварын мэргэшсэн зөвлөх үйлчилгээний тухай хуулийн 14 дүгээр зүйл, Нягтлан бодох бүртгэлийн тухай хуулийн 17 дугаар зүйлийн 17.1.8, Засгийн газрын 2016 оны 165 дугаар тогтоолыг тус тус үндэслэн төрийн байгууллагын зарим чиг, үүргийг төрийн бус байгууллагаар гүйцэтгүүлэхтэй холбоотой харилцааг зохицуулах зорилгоор нэг талаас Сангийн яам, түүнийг төлөөлж Сангийн сайд Б.Жавхлан /цаашид “үүрэг гүйцэтгүүлэгч” гэх/, нөгөө талаас Татварын мэргэшсэн зөвлөхийн нийгэмлэг /регистрийн дугаар:1045822/, түүнийг төлөөлж Гүйцэтгэх захирал Ц.Болормаа /цаашид “үүрэг гүйцэтгэгч” гэх/ нар /хамтад нь “талууд” гэх/ доорх нөхцөлийг харилцан тохиролцож энэхүү гэрээг /цаашид “Гэрээ” гэх/ байгуулав.

ХОЁР. ЕРӨНХИЙ ЗҮЙЛ

- 2.1 Гэрээгээр үүрэг гүйцэтгэгч нь дор дурдсан төрийн байгууллагын зарим чиг үүргийг үүрэг гүйцэтгэгчтэй хамтран түргэн шуурхай, чанартай хийж гүйцэтгэнэ.
- 2.1.1 ТМЗ-ийн эрх олгох, сунгах шалгалтыг “Татварын мэргэшсэн зөвлөхөд эрх олгох, сунгах шалгалт авах журам”-д заасны дагуу зохион байгуулах, шалгалтын үйл явцыг бүрэн цахимжуулах;
- 2.1.2 Татварын мэргэшсэн зөвлөх үйлчилгээ /цаашид: ТМЗҮ гэх/ эрхлэх тусгай зөвшөөрөлтэй хуулийн этгээдийг мэргэжлийн аргазүй, аргачлалаар хангах зорилго бүхий ТМЗ үйл ажиллагааны ерөнхий удирдамжийг шинэчлэн, сайжруулах;
- 2.1.3 ТМЗҮ эрхлэх хуулийн этгээдийн үйл ажиллагаанд хяналт тавих чиг үүргийг хамтран хэрэгжүүлэх, бүртгэлийн цахим мэдээллийн санг хөгжүүлэх;
- 2.1.4 Сангийн яамны НБББГ-аас 2020 онд гаргасан “Боловсролын олон улсын стандартуудыг хэрэгжүүлэх талаар мэргэжлийн байгууллагуудад өгөх зөвлөмж”-ийг хэрэгжүүлэхэд хамтран ажиллах.

ГУРАВ. ҮҮРЭГ ГҮЙЦЭТГҮҮЛЭГЧИЙН ЭРХ, ҮҮРЭГ

- 3.1 Үүрэг гүйцэтгэгчийн үйл ажиллагаа нь холбогдох хууль болон энэ гэрээнд заасны дагуу явагдаж байгаа эсэх талаар дүгнэлт гарган, холбогдох арга хэмжээ авч, шийдвэр гаргах эрхтэй.
- 3.2 Үүрэг гүйцэтгэгч нь Гэрээгээр хүлээсэн үүргээ биелүүлээгүй тохиолдолд үүрэг гүйцэтгүүлэгчийн санаачилгаар энэхүү гэрээг хэсэгчлэн эсхүл бүхэлд нь хүчингүй болгох бүрэн эрхтэй.

- 3.3 Үүрэг гүйцэтгэгчийн Гэрээнд тусгасан үүргээ гүйцэтгэх ажлын төлөвлөгөөг Гэрээнд хавсаргаж, гарын үсэг зурж баталгаажуулна.
- 3.4 Үүрэг гүйцэтгэгчийн Гэрээнд тусгасан үүргээ гүйцэтгэхэд бодлогын дэмжлэг үзүүлж болно.
- 3.5 Гэрээний 3.3-т заасан ажлын төлөвлөгөө нь гэрээний нэг хэсэг болно.

ДӨРӨВ. ҮҮРЭГ ГҮЙЦЭТГЭГЧИЙН ЭРХ, ҮҮРЭГ

- 4.1 Гэрээгээр хүлээсэн үүргээ биелүүлэхэд шаардлагатай үйл ажиллагааны зохион байгуулалтад үүрэг гүйцэтгүүлэгчээс туслалцаа, дэмжлэг авах эрхтэй.
- 4.2 Гэрээний 2.1-д заасан чиг үүргийг цаг хугацаанд нь чанартай хийж гүйцэтгэж, үүрэг гүйцэтгүүлэгчид тайлагнах үүрэгтэй.
- 4.3 Гэрээ болон ажлын төлөвлөгөөний биелэлтийг үүрэг гүйцэтгүүлэгчид тухайн оны 12 дугаар сарын 5-ны өдрийн дотор бичгээр ирүүлж дүгнүүлнэ.
- 4.4 Гэрээ хүчин төгөлдөр болсон өдрөөс хойш 1 сарын дотор энэхүү гэрээний 2.1-д заасан чиг үүргийг хэрэгжүүлэх ажлын төлөвлөгөөг боловсруулж, батлуулна.

ТАВ. ТАЛУУДЫН НИЙТЛЭГ ЭРХ, ҮҮРЭГ

- 5.1 Талууд энэхүү Гэрээгээр хүлээсэн үүргээ биелүүлэхийг гэрээний нөгөө талаас шаардах эрхтэй.
- 5.2 Гэрээний биелэлтийг хангахад технологийн эрх зүйн орчинд өөрчлөлт шинэчлэлт гарсан тохиолдолд хамтын ажиллагааг тэдгээрт нийцүүлэх талаар санаачилга гаргаж ажиллана.
- 5.3 Гэрээгээр хүлээсэн үүргээ хэрэгжүүлэх явцад холбогдох хууль тогтоомж зөрчигдсөн байх болзошгүй тохиолдолд илэрсэн зөрчил дутагдлыг харилцан мэдээлэх, зөрчлийг арилгах талаар хамтран ажиллана.
- 5.4 Талууд гэрээний хугацаа дуусахаас 30 хоногийн өмнө гэрээний үүргийн биелэлтийг гаргаж, гэрээ дүгнэсэн акт үйлдэнэ.

ЗУРГАА. ГЭРЭЭНИЙ САНХҮҮЖИЛТ

- 6.1 Үүрэг гүйцэтгүүлэгч нь үүрэг гүйцэтгэгчийг Гэрээний 2.1-д заасан чиг үүргийг хэрэгжүүлэхтэй холбоотойгоор үүрэг гүйцэтгэгчид дараах дэмжлэгийг үзүүлж болно.
 - 6.1.1 Гадаад, дотоодын сургалт, техникийн уулзалтуудад гүйцэтгэгчийн зардлаар оролцуулах;
 - 6.1.2 ТМЗҮ-ний тогтолцоог сайжруулахад бодлогын дэмжлэг үзүүлэх;

ДОЛОО. ХАРИУЦЛАГА

- 7.1 Гэрээнд заасан үүргээ биелүүлээгүйгээс талуудын хууль ёсны эрх, ашиг сонирхол зөрчигдсөн тохиолдолд Гэрээгээр хүлээсэн үүргээ зөрчсөн тал хууль тогтоомжийн дагуу хариуцлага хүлээнэ.

НАЙМ. МАРГААН ШИЙДВЭРЛЭХ

- 8.1 Гэрээний үүргийн биелэлттэй холбогдуулан гарах аливаа маргааныг талууд харилцан зөвшилцөж шийдвэрлэнэ.
- 8.2 Хэрэв талууд харилцан зөвшилцөж чадахгүй бол Монгол Улсын хууль тогтоомжийн дагуу маргааныг Монгол Улсын шүүхээр шийдвэрлүүлнэ.

ЕС. БУСАД ЗҮЙЛ

- 9.1 Гэрээ нь талуудын эрх бүхий албан тушаалтан гарын үсэг зурж, тамга тэмдэг дарж баталгаажуулснаар хүчин төгөлдөр болно.
- 9.2 Гэрээг 3 хувь үйлдэж гүйцэтгэгч тал 1 хувь, гүйцэтгүүлэгч тал 2 хувийг тус тус хадгалах бөгөөд эх хувь тус бүх хууль зүйн хувьд адил хүчинтэй байна.
- 9.3 Талууд энэхүү Гэрээгээр хүлээх эрх үүргээ бүхэлд нь эсхүл хэсэгчлэн бусдад шилжүүлэхгүй.
- 9.4 Гэрээний талуудын үйл ажиллагааны чиглэл, нэр, удирдлага зохион байгуулалтад аливаа өөрчлөлт орсон тохиолдолд тухайн үйл ажиллагааг залгамжлан хэрэгжүүлэх байгууллага нь Гэрээний эрх, үүргийг шууд хүлээн авах ба Гэрээний үүрэг заавал биелэгдэх шинжтэй байна.
- 9.5 Талууд харилцан тохиролцсоны үндсэн дээр Гэрээнд оруулах нэмэлт, өөрчлөлтийг зөвхөн бичгээр хийх бөгөөд Гэрээнд оролцогч бүх Талуудын эрх бүхий албан тушаалтан гарын үсэг зурж, тамга тэмдэг дарснаар хүчин төгөлдөр гэж тооцогдоно. Ийнхүү оруулсан нэмэлт, өөрчлөлт нь Гэрээний нэгэн адил хүчинтэй байж, түүний салшгүй хэсэг байна.
- 9.6 Гэрээгээр зохицуулаагүй бусад асуудлыг Монгол Улсын холбогдох хууль тогтоомжоор зохицуулж, түүнийг удирдлага болгоно.
- 9.7 Гэрээ нь гарын үсэг зурснаар хүчин төгөлдөр болж, 2021 оны 12 дугаар сарын 31-ний өдөр хүртэлх хугацаанд хүчин төгөлдөр байна.
- 9.8 Гэрээг шинэчлэн байгуулсантай холбогдуулан талуудын хооронд 2016 оны 07 дугаар сарын 25-ны өдөр байгуулсан СЯ 1605 тоот дугаартай гэрээ, 2017 оны 12 дугаар сарын 15-ны өдөр байгуулсан СЯ 1605 тоот дугаартай гэрээний сунгалтыг тус тус дуусгавар болгов.

ГЭРЭЭ БАЙГУУЛСАН:

САНГИЙН ЯАМЫГ ТӨЛӨӨЛЖ:

САНГИЙН САЙД
Б.ЖАВХЛАН

ТАТВАРЫН МЭРГЭШСЭН ЗӨВЛӨХИЙН
НИЙГЭМЛЭГИЙГ ТӨЛӨӨЛЖ:

ГҮЙЦЭТГЭХ ЗАХИРАЛ
Ц.БОЛОРМАА

ХЯНАСАН:

ХУУЛЬ, ЭРХЗҮЙН ГАЗРЫН ДАРГА


З.ЭНХБОЛД



НЯГТЛАН БОДОХ БҮРТГЭЛИЙН

БОДЛОГЫН ГАЗРЫН ДАРГА

Ч.ЧИМИДСҮРЭН



БОЛОВСРУУЛСАН:

НЯГТЛАН БОДОХ БҮРТГЭЛИЙН

БОДЛОГЫН ГАЗРЫН АХЛАХ ШИНЖЭЭЧ

Б.БОЛОРМАА

